



MUSA bertanya sesuatu kepada pihak UMS semasa melawat gerai yang terdapat di karnival tani itu.

Kerjasama UMS, agensi k'jaan dan swasta bantu bangun industri pertanian di Sabah

UB 30-10-16 A1

Oleh YUSOP TEPPU

SANDAKAN: Usaha Universiti Malaysia Sabah (UMS) dengan kerjasama agensi kerajaan dan swasta dalam menghasilkan produk baharu berasaskan pertanian akan dapat membantu kerajaan negeri dalam membangunkan industri pertanian di Sabah.

Ketua Menteri, Datuk Seri Panglima Musa Haji Aman berkata usaha lebih giat oleh UMS bersama agensi-agensi kerajaan di bawah Kementerian Pertanian dan Industri Makanan Sabah (MAFI) adalah amat penting, termasuklah dalam konteks 'food security' untuk memenuhi keperluan permintaan makanan di dalam negara yang semakin meningkat.

"Bagi menjayakan semua usaha UMS ini, ia tentunya memerlukan kerjasama yang padu dari semua agensi kerajaan dan swasta," katanya ketika merasmikan Karnival tani 2016 Fakulti Pertanian Lestari UMS di sini, pagi Sabtu.

Beliau dimaklumkan beberapa perjanjian telah dimeterai sebelum ini antaranya ialah di antara UMS dengan Felda Global Venture Berhad.

"Hari ini juga akan diadakan majlis pertukaran dokumen di antara Fakulti Pertanian Lestari, UMS dengan Hafiz Farm Sdn Bhd. Saya yakin dengan adanya kerjasama erat di antara UMS dengan pihak swasta ia akan memberikan sumbangan besar kepada industri pertanian," katanya.

Dalam pada itu, Musa yang juga Menteri Kewangan Negeri Sabah menjelaskan karnival ini juga amat

bertepatan pada masanya dalam usaha kita memupuk dan menanam minat perniagaan di bidang pertanian dalam kalangan para siswazah, seterusnya melahirkan usahawan tani profesional dan berpendidikan.

Di samping itu, beliau percaya program seperti ini dapat merapatkan institusi dengan masyarakat setempat, seterusnya memacu impak positif khususnya kepada para petani dan masyarakat.

"Ia juga membolehkan para petani memasarkan produk dan hasil pertanian mereka. Pada masa yang sama, karnival ini juga memberi peluang kepada UMS dan agensi-agensi kerajaan mempamerkan hasil-hasil penemuan penyelidikan terkini dan perkhidmatan yang ditawarkan kepada para petani," katanya.